

2015 Wasserratta

As isch halt schu, a schtrubi Ziit
Ma frisst viel z'viel, isch nümma fiit
Kriag'sch Gschenkli, wo jo gliich nit bruch'sch
Miar fiierend Wianacht mitanand - Wianacht mitanand
I schalta mina Fernseh ii
mi'r Frau gnüss'i a Fläschli Wii
für Sex wär i denn au no z'haa
nu Eina schtört - dr Maik Schiiwaa
Luag gsesch varuss' dr erschti Schnee
grad will i mini Schkii schu nee
doch Einem passt das nit in' Kram
will i Laaxer bin, vu do doba bin, lheimisch bin!

Ganz heimlich hetti's sölla sii
das isch doch nit so schwär
as isch doch gar nüt schlimm's derbii
miar finden das nit fär
Du kasch das macha wo Du witt, und zu jedra Zitt
as isch ganz liacht, Du truggsch nu druff,
und schu isch's passiert:
S'isch doch nu a klis'as Selfie gsii
Selfie könd doch au erotisch sii
son'as Selfie ohni d'Kleider a
müasst'ii denn nit vur Merkel ha!

I wett halt no - lang König sii
bis an mis Läbensend
mis Motto isch schu immer gsii
ma nimmt mit beidna Hend
doch eimol schtosch - vor'm Himmelstor
ganz sctiif im wiisa Hemd
denn singt nu no - dr Engelskhor
erschd denn isch Blatter's End!

Achmed, Ivan, Serifat, Merdan
Rachmud, Estal, Lumitre, Zoran
Hector, Nime, Abdulla, Jorge
Kader, Salvo, Elena, Carlos
Allas was miar säga wen, Schwiz miar hen di so liab
Allas was miar säga wen, Schwiz miar hen di so liab
Blocher, Murer, Widmer-Schlumpf, Berset
SP, Linggi, SVP, Rehti
Gripen, Gotthard, Ecopop, Lehrplan
IV, EO, AHV, OR
Allas was miar säga wen, Schwiz das isch doch Betrug
allas was miar säga wen, Schwiz das isch doch a Luug
Tatalos, hoggens in Bern,üusers Volk isch'na so fern
Atemlos, kalt und leer, Politik macht's üs schwer!

Am Obig wetsch ga essa go
d'Lasagne losch denn gschider sctoh
ob Kebap, Dürüm oder Fisch
Du weisch hüt nit was dinna isch
As gäb't do no a langi Schtross
döt isch denn d'Uswahl huara gross
ma weiss nit g'nau, wia alt dia sind
vu wo sind denn dia schöna Kind
Denn dussa vor dr grossa Stadt
Frischfleisch sctohht sich d'Füass fascht platt
Skandal - im Bündnerland
Skandal - im Bündnerland
Skandaaaal - um Carna Grischa!

z'Züüri im'na nobla Klub
finden miar das würkli schtrub
döt wänd's - kei Pelz - das isch - kei Scherz
z'Züüri in dem nobla Klub
Do muasch glaub' Züzzi sii
so blöd kasch suss nit sii
das weiss hüt sicher - schu jeda
wo luagend dia denn hii
das kann kei Pelzli sii
was d'Frau döt dunna - hüt treit!

Brüal doch nit, wenn dr Radar blitzt,
luag das au d'Frisur guat sitzt,
d'Rechnig kunnt, jetz isch's passiert
z'Billett weg, i bin blamiart
alles, alles isch vorbi
doch Eina isch'as Genie
Eina wo nit messa kann,
hilft Diar den us'am grossa Schlamm,
Us dr Zittig, kasch's vernäh
Eina hält halt nit ufgäh
allas was do kunnt vum Drugger
isch wägam - dumma Tschugger

Am Ohr dis Händy - zahl'sch grad 100 Frangga
bim fähra ässa - sägen's au no tangga
as wär viel besser - miar wüssend das genau
gäbt's au Buassa - für z'schnorra vu dr Frau!